

**“Menn færðu börn til Jesú....
Og Jesús tók þau sér í faðm, lagði hendur yfir þau og blessaði þau”** (Mark 10.13-16)



Tindra Líf Gunnarsdóttir skírð. Sandra Kristjánsdóttir móðir hennar og Sr. Arna Grétarsdóttir.

Að skíra barn í nafni föður, sonar og heilags anda er eitt af undrum þjónustunnar. Að horfa í augu barnsins, foreldranna og allra ástvina er einstök stund sem gefur kraft til annarra starfa á akri Drottins. Að standa augliti til auglitis á slíkum stundum er eins og að mæta sjálfum kærleiksríkum Guði. Þá lýsir ásjóna Drottins svo bjart og skýrt. Blessun hans og kærleikur verður á einhvern óútskýranlegan hátt ápreifanleg.

Árið 2011 einkenndist af samstarfsanda og vináttu í þjónustunni. Það leystist úr læðingi kraftur sem kom til leiðar breytingum á miðstöð safnaðarins í Ósló. Nýtt húsnæði var keypt í upphafi árs 2012 sem var ávöxtur vinnu sl. tveggja ára í húsanefnd. Miklar væntingar standa til þessa að Íslenska kirkjustarfið í Noregi megi eflast við þessa flutninga. Það má segja að unglingurinn sé fluttur að heiman og fullorðinsárin tekin við. Það er löngu orðið ljóst að Íslenski söfnuðurinn í Noregi er myndugur söfnuður sem er búinn að sanna sig og festa rætur sínar hér til þjónustu í Jesú nafni við þau sem vilja þiggja og láta leiðast af andanum, hvort heldur er á mikilvægum tímamótum lífsgöngunnar eða með þátttöku í íslensku helgihaldi um landið. Til þess verkefnis fær söfnuðurinn fjármagn frá norska ríkinu og sveitafélögum í formi sóknargjalda sem skulu fara í það að boða trúna á Jesú Krist, upprisinn frelsara manna.

Það er ánægjulegt að mikil eftirspurn er eftir þjónustu safnaðarins og hefur prestur því miður ekki getað sinnt öllum beiðnum sem inn á borð koma.

Guðspjónustur og helgihald



Börnin eru alltaf sérstaklega boðin velkomin í messurnar.

Messað var á einum 12 stöðum árið 2011. Þeir staðir sem messað var á eru: Ósló, Drammen, Kristiansand, Stavanger, Bergen, Brándheimur, Tromsø, Sandefjord, Geilo, Ålesund, Molde og Reykjavík. Þeir aðrir staðir sem hafa fasta tengiliði og farið verður til ef óskað er eftir eru: Fredrikstad, Skien, Kristiansund og Karmøy. Haldnar voru 54 kirkjuguðspjónustur, bæna- og/eða helgistundir og 36 sunnudagaskólar. 2743 sóttu helgihald safnaðarins á árinu og er þá ekki talin mæting í sunnudagaskólann um landið.

Við skipulag á guðspjónustunum eru **tengiliðirnir** ómissandi sem fyrr. Þeir aðstoða m.a. við að bóka kirkju, auglýsa, sækja prest á flugvöll (ef þarf), sjá um að hringja út og minna á og auglýsa messuna og að sjá um að halda utan um messukaffið á eftir ásamt Íslendingafélögunum. Þessi aðstoð tengiliðanna er ómetanleg og er starfið um landið mögulegt vegna þeirra. Tengiliðirnir eru oftast en ekki formenn Íslendingafélaganna eða starfa náið með þeim.

Safnaðarstjórn fór með presti í messuferðir sem hin fyrri ár og hélt þar vinnufundi og tók þátt í messuhaldinu. Í mars var farið til Morde þar sem tekið var rausnalega á móti hópnum af hótélstjórnunum á Rica Ragnari Pálssyni og tengiliðnum Theodóru Baldvinsdóttur. Í október var fundað í Kaupmannahöfn með íslenskum sóknarnefndum ÍKE ásamt prófastinum okkar sr. Birgi Ásgeirssyni. Samstarf sóknarnefnda er mikilvægt fyrir söfnuðina erlendis og tengir okkur einnig þjóðkirkjunni á Íslandi. Í safnaðarstjórn situr einn fulltrúi frá Tromsø, einn frá Bergen og einn frá Stavanger. Þessi þátttaka landsbyggðarinnar undirstrikar það að söfnuðurinn þjónar um allan Noreg.

Ískórinn syngur við guðspjónustur í Ósló og víða ef eftir því er leitað. Ískórinn starfar fyrir söfnuðinn eins og kirkjukór og heldur uppi helgihaldi safnaðarins í Ósló með sálmasöng og

messusvörum. Hér er Ketil Grötting stjórnanda kórsins og organistanum Peggy Jensen Lous sérstaklega þakkað fyrir sína góðu þjónustu.

Íslendingakórar hafa verið stofnaðir í Bergen og í Þrándheimi. Í undirbúningi er að endurvekja kór í Stavanger. Það hefur verið ómetanlegt fyrir helgihald safnaðarins að geta leitað til íslensks tónlistarfólks sem tilbúið erað færa landanum fagnaðarboðskapinn í tónum víða um land.

Alþjóðlegur bænadagur kvenna er fyrsta föstudag í mars ár hvert. Hefð er komin á með að Íslenski söfnuðurinn tekur þátt ásamt fleiri kristnum söfnuðum í Nordbergkirkju. Það er mikilvægt fyrir lítinn söfnuð að finna sig í hópi trússystkina víða að úr heiminum.

Aðventuhátíðin í Ósló heppnaðist vel. Hátíðarræðu flutti Guðrún Ebba Ólafsdóttir og eru henni færðar þakkir fyrir kjark og styrk sem hún hefur sýnt. Hún hitti einnig nokkrar konur á námskeiði safnaðarins sem hún hjálpaði með uppörvandi orðum og aðstoð. Tónlistarfólkið koma að hluta frá Íslandi. Björg Þórhallsdóttir og Hilmar Örn Agnarsson voru gestir ásamt Hjörleifi Valssyni sem strýkur strengi fiðlunnar að einstakri snilld við ýmis önnur tækifæri. Ískórinn undir styrkri stjórn Ketil Grötting söng einnig sem fyrr. Íris Arnarsdóttir las jólasöguna að þessu sinni.

Aðrar kirkjulegar athafnir og kærleikspjónusta



Árið 2011 voru skírð þrettán börn, 2 í kirkjum en 11 í heimahúsum. Hjónavígslur voru fimm og sjö kveðjuathafnir. 17 börn sóttu **fermingarfræðslu** safnaðarins veturinn 2010-11. Í vetur eru skráð í fræðslu 57 fermingarbörn frá 16 stöðum á landinu.

Prestur sinnti **sálgæslu og kærleikspjónustu** sem fyrr og fór í 25 hús- og sjúkravitjanir á árinu. 126 sálgæsluviðtöl voru veitt á skrifstofu/kirkjum eða hótélum og 112 símasálgæsluviðtal var veitt.

Ólafíusjóður Íslenska safnaðarins í Noregi var stofnsettur 1. nóvember 2009. Í stjórðsstjórn sitja ásamt presti, Kristján Daðason og Dr. Sigríður Dúna Kristmundsdóttir. Hægt er að sækja um í sjóðinn á þar til gerðu eyðublaði sem hægt er að nálgast á netinu: www.kirkjan.no, hjá starfsmanni eða presti.

Ólafíusjóður úthlutaði samtals árið 2011 Nok. 141.000.-. Annars vegar til Hjálparstarfs kirkjunnar á Íslandi samkvæmt aðalfundarsamþykkt og hins vegar til einstaklinga og fjölskyldna sem búsett eru í Noregi.

Símatími prests er frá þriðjudegi til föstudags frá kl. 10-11 og mánudagar eru vikulegir frídagar. Viðtalstímar eftir samkomulagi. Alltaf er hægt að hringja á skrifstofuna sem mun auglýsa nýjan opnunar- og símatíma í nýju húsnæði og auknu stöðuhlutfalli starfsmanns.

Safnaðarstarfið



Sunnudagaskóli er nú starfræktur reglulega á vegum safnaðarins í Ósló, Drammen, Bergen og Stavanger, Sandefjord, Fredrikstad og Kristiansund. Söfnuðurinn vill endilega heyra frá fólki sem er tilbúið að koma af stað sunnudagaskóla um landið. Við barnastarfið starfa nú tólf leiðtogar. Umsjón með sunnudagaskólanum í Ósló hafa þær Hrefna Grétarsdóttir og María Gunnarsdóttir guðfræðinemi. Lilja Björk Þorsteinsdóttir og Lína Hilmarsdóttir hafa umsjón með barnastarfi í Stavanger og í Bergen hafa umsjón með sunnudagaskólanum Helga Sigríður Þórsdóttir og Ingibjartur Jónsson sem einnig er liðtækur á orgelið þegar messað er. Svala Snorraddóttir hefur umsjón með sunnudagaskólanum í Drammen. María Gunnarsdóttir guðfræðinemi hefur verið með sunnudagaskóla í Fredrikstad. Í Kristiansund er Salóme Huld nýbyrjuð með sunnudagaskóla. Bogi Benediktsson og Sigurður Jón Sveinsson sem hafa verið á Biblíuskóla í Ósló hafa verið liðtækir í sunnudagaskólann, unglingastarfið og annað barnastarf. Fengur er fyrir söfnuðinn og alla kristni að hafa gott og áhugasamt fólk á akrinum.

Prestur hóf átak veturinn 2010 í því að koma inn á íslensku heimilin sunnudagaskólanum á DVD sem og geisladisknum "Ég get sungið af gleði" með sunnudagaskólasöngvunum. Með þessu er reynt að mæta börnunum í dreifðinni og styrkja heimilisguðrækni.

Hið árlega Leiðtoganámskeið á vegum fræðsluviðs Biskupsstofu var haldið í Gautaborg. Þar komu saman að venju leiðtogar í starfinu af norðurlöndunum.

Æskulýðshópur safnaðarins er að festa rætur sínar þó erfitt sé að halda sambandi við unglingana sem búa dreift um Noregsbyggðir. Félagar í æskulýðsfélaginu geta verið þau sem eru fermd og hafa áhuga á því að skemmta sér á heilbrigðan hátt í góðum félagsskap hvers annars og vilja halda við fermingarheitinu. Ár hvert er farið til Íslands á Landsmót Æskulýðsfélaga og í október 2011 fór hópur skemmtilegra unglinga til Selfoss. Æskulýðshópur safnaðarins er hluti af æskulýðssambandi Þjóðkirkjunnar – ÆSKP. Þessi tilboð safnaðarins er ein af stöðum safnaðarstarfsins og liður í því að halda tengslum við fermd ungmenni. Æskulýðshópar eru að myndast í Ósló, Stavanger og Bergen.

Fermingarbörnin eru búsett víða um Noreg og eins og undanfarin ár hittast fermingarbörn íslensku safnaðanna í Noregi, Svíþjóð og Danmörku í september og í maí á fermingarfræðslunámskeiði. Fermingarbörnin hafa verið mjög dugleg við að aðstoða þegar messað er á þeirra heimasvæðum. Prestur nær að hitta hluta fermingarbarnanna í ferðum sínum um landið.

Hjóna- og sjálfstyrkingarnámskeið fyrir konur voru haldin og unnin í samstarfi prests og sálfræðingsins Eyglóar Sigmundsdóttur. Þessi námskeið eru haldin fyrir hópa eftir beiðni frá safnaðarmeðlimum víða um landið.

Samvinna og upplýsingamál



Fréttabréfið kemur út ár hvert í lok janúar og september. Ætlunin er að halda þeirri útgáfu áfram. Hrafnhildur Brynjarsdóttir grafískur hönnuður hefur sett upp fréttabréfið og verið presti innan handar með yfirlestur ásamt Ingu Erlingsdóttur starfsmanni. **Facebook** síða safnaðarins

“Íslenski söfnuðurinn í Noregi” ásamt facebook síðum fyrir sunnudagaskólann í Bergen, Stavanger og Kristiansund eru virkar. Þar er starfið auglýst og skilaboðum komið til sóknarbarna. Eins hafa messuauglýsingar verið settar inn á facebook síðu “Íslendingar í Noregi” og svo auðvitað inn á heimasíðu safnaðarins www.kirkjan.no.

Unnið er að því að gera heimasíðu safnaðarins aðgengilegri og notendavænni. Um sístætt verkefni er að ræða á þeim vettvangi.

Lýðveldishátíðin er haldin í Ósló í samstarfi við **Íslendingafélagið í Ósló**. Hátíðarhöldin hefjast með helgihaldi og hefur gefist vel að vera í og við Nordbergkirkju. **Messukaffið** er framhald guðspjónustunnar. Það er dýrmætt fyrir okkur að geta sest niður og mætt hvors annars andlitum, drukkið kaffi og spjallað saman. Íslendingum og Íslendingafélögum um landið er þakkað fyrir að halda utan um þetta ómetanlega kaffisamfélag.

Mikilvægt er fyrir söfnuðinn og prest að geta leitað til **Sendiherra** og starfsfólks alls á sendiráðsskrifstofunni. Samstarf er hafið við íslenska presta sem eru í þjónustu norsku kirkjunnar. Sr. Þorvaldur Víðisson sem þjónar á eyju utan við Þrándheim messaði fyrir Íslendingana þar fyrir jólin. Þakkir eru færðar fyrir þá þjónustu. Söfnuðurinn væntir góðs af samstarfi við fleiri íslenska presta í framtíðinni og vonar að það megi auka og bæta þjónustuna.

Inga Erlingsdóttir starfsmaður á skrifstofunni í Ósló hefur í nokkrum skrefum verið færð í fullt starf. Eru það viðbrögð við auknum fjölda sóknarbarna.

Óslóarbiskup og dómprófastur hafa boðað prest til **samráðs- og prestafundar**. Það hefur verið ánægjulegt að finna sig í hópi kollega í norsku kirkjunni. Það er von mín að allt samstarf við systurkirkju okkar, norsku kirkjuna haldi áfram að styrkjast.

Megi kærleiksríkur Guð láta ásjónu sína lýsa yfir söfnuð sinn um alla framtíð.

Arna Grétarsdóttir,

Prestur Íslenska safnaðarins í Noregi

Ósló í apríl 2012